

# U Georges St-Pierre, u rangiakhun MMA ba kynsai jong ka UFC

U Georges St-Pierre, uba la tip lyngkot da u GSP, u dei u nongialehkai MMA barim jong ka ri Canada. La n̄iew ia u kum uwei na ki rangiakhun ba khraw tam ha ka histori jong ka jingialehkai mixed martial arts (MMA). U St-Pierre u la long u lahdud ha ki ar tylli ki Division ha ka Ultimate Fighting Championship (UFC), hadien ba u la jop nam lahdud ha ka kyrdan jingkhia Welterweight bad ka Middleweight division.

U St-Pierre u dei u lahdud ba la jop lai sien ia ka UFC Welterweight Division, hadien ba u la jop arsien ia ka burom lahdud ba pura bad ka nam lahdud ba shipor (interim title) hapdeng u bnai Naiwieng jong u snem 2006 bad u bnai ãiong 2008. U la shah kynthup ha ka kyrdan ba ha khlieh duh (#1) kum u lahdud ka Welterweight ha ka pyrthei ha ki katto katne snem da ka Sherdog. Ha u snem 2008, 2009 bad 2010 u la shah jied ban khur ia ka khusnam ‘Canadian Athlete of the Year’ jong ka Canada da ka Rogers Sportsnet. Ka Fight Matrix ka buh ia ka kyrteng jong u kum u nongialehkai MMA ba khraw tam ha ka kyrdan iakhun Welterweight ha ka histori. U la shah jied kum u nongialehkai MMA uba khraw tam (pound-for-pound) ha ka histori katkum ka ka jingwad bñiah jong ka The Athletic MMA.

U St-Pierre u la shongthait noh kum u lahdud jong ka UFC Welterweight Division ha u Nohprah 2013, hadien ba u la bat ia ka rekord jong ka jingjop kaba bun tam ha ki jingiakhun na ka bynta ka nam lahdud bad ka jingjop kaba ar kaba jrong tam ha ka histori jong ka UFC (2,204 sngi) katba u dang iada ia ka nam lahdud jong u haduh khyndai sien lynter. U la jop ruh ia ka rekord kaba 33 sien lynter ki Round ha ki jingiakhun hapdeng u snem 2007 haduh 2011. U la wanphai biang sha ka Octagon (ka rynsan iakhun jong ka UFC) ha u bnai Naiwieng 2017 ha ka UFC 217, ha kaba u la pynliem ia u Michael Bisping da ka buit pynrairem (submission) ban jop ia ka nam lahdud ha ka Middleweight Division, bad u la kylla long u nongialehkai ba saw ha ka histori jong ka UFC ban long u nongjop ha ki ar tylli ki Division. U la iehnoh ia ka burom lahdud hadien katto katne taiew, da kaba kdew namar ka daw jong ka jingkoit jingkhiah, bad u la shongthait noh na ka MMA.

Shabar jong ka kam iakhun MMA, u St-Pierre u la paw ha ki katto katne ki phlim, kum ka phlim ha kaba iadei bad ka jingiashoh iadat kaba la tip kyrteng da ka ‘Kickboxer: Vengeance (2016), ka phlim superhero Captain America: The Winter Soldier (2014), bad ka Cartels (2017) bad King of Killers (2017).

**Ka jingim ba dang khyannah jong u St-Pierre:**  
La kha ia u St-Pierre ha Saint-Isidore, Montérégie, Quebec, ha ka longiing jong u Roland bad ka Pauline St-Pierre ha ka 19 tarik u Jymmang, 1981, bad u don arngut ki para kynthei kiba kham rit. U St-Pierre u la mad ka jinglong khyannah kaba eh bha, ha ka por ba u leit skul u la shah lehbein ha kaba kiwei pat ki khyannah skul kin tuh ia ki jaini bad ka pisa jong u. Kum u khyannah u la ialehkai hockey, skate bad u la iashim bynta ha ki katto katne ki jingialehkai. U la sdang ban pyntbit ha ka Kyokushin Karate ha ka rta kaba hyn̄niew snem ban iada ialade na ki khyannah kiba ju leh ba heh ha skul. U St-Pierre u la pule ha ka skul bah ha École Pierre-Bédard ha kaba u la bat ia ka rekord jong ka skul na ka bynta ka jingbun ban pyndep ia ka chin-ups. Hadien ba u la dep ka jingpule u la pynrung kyrteng ha ka jingpule shaphang ka kinesiology ha Cépeg Édouard-Montpetit. Shuwa ba un kylla long uba kynsai kum u nongialehkai Mixed Martial Arts, u St-Pierre u la trei kum u nongap pahara ha kawei ka jaka ialeh sngewbha (night club) ha Montreal ha South Shore kaba kyrteng ka Fuzzy Brossard bad kum u nonglum jaboh haduh hyn̄reiw bnai ban siew ia ka bai skul jong u. U la long lypa u 2nd dan Kyokushin karate black belt ha ka rta kaba 12 snem, ka jingiakhun MMA kaba nyngkong eh jong u ka long ha ka rta kaba 20 snem.

Kum u samlu, u St-Pierre u la ioh mynsiem da kaba peit ia u Jean-Claude Van Damme, bad u la batai ia ka jingiakhun pyrshah jong u ha ka phlim Kickboxer: Vengeance kum "ka jingphohsngw kaba la urlong".

**Jingsdang ban pyntbit iade:**  
U St-Pierre u la shah hikai bad katto katne ki kynhun ha ki jaka kilanmet (gym) bapher bapher ha baroh kawei ka jingim kum u rangiakhun MMA. U la sdang ban pyntbit ha ka Wrestling hapdeng ka rta kaba 19 bad 20 snem ha ka Reinitz Wrestling Centre's Montreal Wrestling Club kaba la khlieh da u Victor Zilberman, bad u la bteng ban kilanmet ha kane ka jaka haduh ba kut ka jingim jong u kum u rangiakhun MMA. U la shah hikai ruh ha u lahdud jong ka pyrthei u Guivi Sissaouri. U St-Pierre u la pawnam namar ba u don ka rukom ialehkai wrestling kaba khlañi bad u la iaid shakhmat ban ialehkai kham bha ban ia ki katto katne ngut ki nongialehkai wrestling kiba la shemphang bha. U la ju pynlut bun por ban kilanmet bad ki dkhoh jong ka kynhun ialehkai wrestling jong ka ri Canada bad u la thmu ban wad ia ka jaka ha ka kynhun na ka bynta ki jingialehkai Olympic jong u snem 2008 bad 2012 hyn̄rei u la shah pynthut man la ka por namar ka jingaiti jong u kum u lahdud ka UFC Welterweight Champion.

Hashwa ka jingiakhun pyrshah ia u B.J. Penn ha ka UFC 58, u la kilanmet ha Renzo Gracie Jiu-Jitsu Academy ha New York City. U St-Pierre u la iohpdang ia ka ‘brown belt’ ha ka BJJ na u Renzo Gracie ha ka 21 tarik Naitung, 2006. Ha u Nailur 2008, u St-Pierre u la ioh ia ka ‘black belt’ ha ka Brazilian jiu-jitsu hapoh ka jingpyntbit jong u Bruno Fernandes.

U St-Pierre u la sdang ban kilan met bad u Rashad Evans, u Nathan Marquardt, u Keith Jardine, u Donald Cerrone bad kiwei kiwei ki nongialehkai mixed martial arts ha ka skul jong u Greg Jackson's Submission Fighting Gaidojutsu ha New Mexico. Katto katne na ki samlu pule jong u Jackson ki la synran lang ia u St-Pierre sha Montreal ban iarap ban pynkrehre ia u na ka bynta ka jingiakhun ha ka UFC 94 pyrshah ia u B.J. Pen ha Tristar Gym, kynthup ia u Keith Jardine, Nathan Marquardt, Donald Cerrone, bad u Rashad Evans. Ki coach jong u St-Pierre na ka bynta ka strength & conditioning u dei u Jonathan Chaimberg jong ka Adrenaline Performance Centre ha Montréal; u Head Trainer udei u Firas Zahabi jong ka Zahabi MMA. Baroh arngut ki la synran ia baroh ki jingialehkai jong u St-Pierre bad ki dang bteng ban long ki paralok ba jan jong u. Hapdeng u snem 2006 bad 2009, u St-Pierre u la shah hikai ha ka jingialehkai Muay Thai hapoh ka jingpyniaid jong u Phil Nurse ha ka Wat ha ka nongbah New York.

**Ka jingim ha ka Mixed Martial Art:** Ultimate Fighting Championship  
U St-Pierre u la mad ia ka jingialehkai kaba nyngkong jong u ha ka UFC 46, ha kaba u la pynliem ia u Karo Parisyan da ka rai kaba la mynjur lang (29-28, 30-27, bad 30-27). Ka jingiakhun kaba bud jong u ha ka UFC ka long pyrshah ia u



Jay Hieron ha ka UFC 48. U St-Pierre u la pynliem ia u Hieron lyngba ka Technical knockout (TKO) tang hadien 1 minit bad 42 sekhon jong ka wat kaba nyngkong.

Hadien ka jingjop kaba ar jong u ha ka UFC, u la iakhun pyrshah ia u Matt Hughes ha ka UFC 50 na ka bynta ka UFC Welterweight Championship kaba lait. Wat hapdeng ka jingialehkai kaba itynnat pyrshah ia u nongialehkai MMA uba kham tbit, u St-Pierre u la hap ban rai rem (Tap Out) namar ka ‘Armbar’ ha ka por ba dang sah tang 10 sekhon ha ka Round kaba nyngkong. Ka jingshah rem ka dei kaba nyngkong eh ha ka jingim jong u St-Pierre.

Hadien ka jingshah rem jong u ha u Matt Hughes, u St-Pierre u la wanphai da kaba jop ia u Dave Strasser ha ka TKO 19 da ka buit pynrairem kaba la tip da ka ‘Kimura Submission’ ha ka round ba nyngkong. Nangta u la wanphai biang sha ka UFC ban aireng pyrshah ia u Jason Miller ha ka UFC 52, da kaba pynliem ia u Miller da ka rai kaba ia mynjur lang (30-27, 30-27, bad 30-27).

Hadien nangta la buh ia u St-Pierre ban aireng pyrshah ia u nongialehkai ba la kham paw jong kane ka Division u Frank Trigg ha ka UFC 54. U St-Pierre u la synshar ha baroh kawei ka jingiakhun bad u la jop da kaba ksinh ryndang lane ka ‘Rear-Naked Choke’ ha ka Round kaba nyngkong. Nangta u la iakhun pyrshah ia u Sean Sherk ha ka UFC 56. Hapdeng ka Round kaba ar, u St-Pierre u la long u nongialehkai uba ar ban pynliem ia u Sherk bad uba nyngkong eh ban pyndep ia u. Ha ka jingiakren hadien ka jingialehkai, u la dem khrup da ka jingkyrpad kaba sngewrit ia ki bor pyniaid jong ka UFC ban ai biang ia u ia ka lad ban iakhun na ka bynta ka nam lahdud.

Ha ka UFC 58, u St-Pierre u la pynliem ia u lahdud barim jong ka UFC welterweight u B.J. Penn ban ioh ia ka kyrdan ‘No. 1 contender’ lane u rangiakhun uba hakhmat eh na ka bynta ka UFC welterweight Championship. U St-Pierre u la jop ia ka jingiakhun lyngba ka split decision bad ula pynthikna ban iakhun biang pyrshah ia u Matt Hughes , uba bat ia ka nam lahdud ha kata ka por ha ka UFC 63. Namar ka jingmynsaw u St-Pierre u la hap ban weng noh ialade na kane ka jingiakhun, bad u la shah bujli da u rangiakhun ba u la pynliem ha u Lber, u B.J. Penn. Ka UFC ka la pynbna hadien ba u St-Pierre un ioh ia ka lad ban iakhun ia ka nam lahdud ynda ka jinglong jingman jong u ka la koit pura.

**Ka jingjop bad ka jingshah rem ha ka Welterweight Championship:**

Ha ka UFC 63, u St-Pierre u la mih madan ban kyrshan ia u para nong Canada u David “The Crow” Loiseau. Ha kajuh ka sngi, hadien ba u Matt Hughes u la pynliem ia u B.J. Penn, u St-Pierre u la wanrung hapoh Octagon ban ialeh ban tbeh ding ia ka jingiakhun na ka bynta ka nam lahdud jong u kaba dang wan pyrshah ia u Hughes, da kaba pynpaw ba u sngewkmen ba u Hughes u la jop ia ka jingiakhun jong u, hyn̄rei ba um da “sngewtynnad” ia ka rukom lehka jong u Hughes.

U St-Pierre u la aireng biang ia u Matt Hughes ha ka UFC 65 na ka bynta ka UFC Welterweight Championship. Ka jingiakhun ka la jan shah pynsangeh noh satang khyndiat shuwa ban kut ka Round kaba nyngkong ha ka por ba u St-Pierre u la pynkyllon khram ia u Hughes ha madan da kaba ‘Bok Her’ lane ‘Superman Punch’ bad kura artad da ka kti kadiang, hyn̄rei u Hughes u la lah ban lait im ban pynjlan ia ka jingiakhun sha ka kylla kaba ar. Hyn̄rei ha ka Round kaba bud, u St-Pierre u la pyndep ia ka kamram ban jop lyngba ka ‘Technical knockout’ hadien ba u la ioh ban pynkyllon biang ia u Hughes bad pynbud sa da kaba kura bad tbuk bad tbak khlem sangeh. Kane ka jingiakhun ka la pynlong ia u ban khur ia ka ‘Knockout of the Night award’. Hadien kane ka jingiakhun, u St-Pierre u la soi ia ka jingiateg kular ha u Kyllalyngkot 30 tarik, 2007, na bynta 6 tylli ki jingiakhun bad ka UFC.

Ha ka UFC 69 ha u snem 2007, u St-Pierre u la mad ia ka jingshah rem kaba ar (bad kaba khatduh, haduh ka por ka jingshongthait ba pura jong u ha u snem 2019) ha ka MMA, ha kaba u la duh noh ia ka nam lahdud jong ka UFC welterweight Championship ha u nongjop jong ka The Ultimate Fighter 4, u Matt Serra, haba u Serra u la pynbor ia u referee ban pynsangeh hadien ba kura khlem sangeh. U St-Pierre u la ong ba u la shah rem namar ka jingmyn saw lah ban pynleit jingmut bha namar ki jingeh kiba u iakynduh ha ka jingim shimet jong u, kynthup ia ka jingklad jong u para ba jan bad ka jingpang ba jur jong u kpa jong u.

Ki jingpyrshang ban jop biang ia ka Welterweight Championship: Ha ka 25 tarik Nailar, 2007, ha ka UFC 74, u St-Pierre u la jop lyngba ka rai ba ia mynjur lang (unanimous decision) da 30-27, 29-28, 29-28 pyrshah ia u Josh Koscheck.

Shuwa bad hadien kane ka jingiakhun, u St-Pierre u la pynpaw ia ka jingthmu jong u ban kurup biang ia ka nam lahdud kaba u la duh noh. Ka jingjop jong u ia u Koscheck ka la buh ia u ha ka kyrdan ba nyngkong eh (No. 1 con-



tender) ban aireng na ka bynta ka UFC Welterweight Championship. Kane ka jingiakhun ka dei ban long pyrshah ia u nongjop ha ka jingiakhun hapdeng u Matt Hughes bad u Matt Serra. U Matt Serra u la hap ban weng noh ialade na ka UFC 79 namar ka jingmynsaw ha ka por ba kilanmet, bad ha jaka jong u la wan bujli da u St-Pierre ban aireng ia u Hughes na ka bynta ka nam lahdud ba shipor lane ka Interim UFC Welterweight Championship.

U Hughes um shym la lah ban leh kaei kaei kaba pynshitom pyrshah ia u St-Pierre, uba la pyni biang ia ka jingtbit jong u, ha kaba ym tang ba u la kiar na baroh ki jingpyrshang ban pynkyllon (takedown) jong u Hughes hyn̄rei u la pynkyllon ruh ia u katba mon. Kumba la jia ha ka jingiakhun kaba nyngkong jong ki, u St-Pierre u la pyrshang biang ban pynrairem da ka ‘Kimura Submission’ ia ka kti kamon jong u Hughes, nangta u la kylla sha ka ‘Armbar’. U Hughes u la shah shitom ban dang sah ha ka jingiakhun, hyn̄rei u la shah pynbor ban rai rem da ka ktien ha ka por 4:55 jong ka Round kaba ar, kaba la pynlong ia u St-Pierre kum u lahdud ba shipor lane Interim Welterweight Champion. Kane ka jingialehkai ka la pynlong ia u ban khur ia ka khusnam ‘Submission of the Night award’.

**Ka jingiakhun ban pyniatylli ia ka UFC Welterweight Championship:**

Ha ka UFC 83 ha ka 19 tarik u ãiong, 2008, u St-Pierre u la iakhun pyrshah ia u Matt Serra ha ka jingiakhun kaba ar (rematch) ban pynthikna ia u lahdud ba pura jong ka UFC Welterweight. Katei ka dei ka lypungpung iakhun kaba nyngkong jong ka UFC ha Canada bad la pynlong ia ka ha Bell Centre ha Montreal, Québec. Ha ka khyllipmat shuwa ban kut ka round kaba ar, ka jingiakhun ka la pynsangeh noh da u referee u Yves Lavigne hadien ba u la iohi ia u Serra um lah ban iada ialade na u St-Pierre, uba la thombor khlem jingmap da ki khohsiew bad ka kura artad.

Ha u snem 2008, u St-Pierre u la ioh ban pawkhamat ha ka Magazine ‘Karaté Bushido’, ka Magazine kaba la rim tam kaba ju pynleit jingmut tang ha ka martial art ha Europe, da kaba iasoh lang bad ki kyrteng ba la pawnam kum u Bruce Lee (1974), Jean-Claude Van Damme (1993), Bas Rutten (1997), Rickson Gracie (1998), Jackie Chan (2000), Fedor Emelianenko (2007), Francis Ngannou (2019), bad u Dave Leduc (2020).

**Ki jingiakhun ban iada ia ka Welterweight C'ship:**

Ka jingiakhun kaba nyngkong eh jong u St-Pierre hadien ba u la ioh biang ia ka belt ka long pyrshah ia u Jon Fitch ha ka UFC 87. U Fitch u la don ha ka jingjop kaba 16 sien lynter ki jingiakhun bad ka jingjop pyrshah ia ka St-Pierre kan jin da la long ka jingjop kaba 9 sien lynter jong u Fitch ha ka UFC, ka rekord thymmai jong ka UFC. Hyn̄rei u St-Pierre u la pyn pulom ia kane da kaba pynliem ia u Fitch da ka rai kaba ia mynjur lang (50-43, 50-44, bad 50-44). Kane ka jingiakhun ka la pynlong ia u St-Pierre ban khur ia ka khusnam ‘Fight of the Night’ kaba nyngkong eh.

Ka jingjop ia u Fitch ka la buh ia kawei na ki jingiakhun kaba ar sien kaba la khmih lynti bha ha ka histori jong ka UFC. U B.J. Penn u la rung ha ka octagon hadien ka jingshah rem jong u Fitch bad u la kop ban ia aireng biang ha ka sien kaba ar pyrshah ia u St-Pierre. Kane ka jingiakhun kaba ar hapdeng jong ki, ka la long ha ka 31 tarik u Kyllalyngkot, 2009, ha ka UFC 94. Ka Round kaba nyngkong jong ka jingiakhun ka la long kaba iaryngkat bor, watla u St-Pierre u la synshar ia baroh kawei ka jingiakhun ha ki Round ba dang sah, da kaba lypmat jem bad ka kura artad ban pynsajia ia u B.J. Penn.

Kane ka jingiakhun ka la kut noh hadien ka Round kaba saw ha kaba u cornerman jong u Penn, u Jason Parillo u la kyrpad ia u referee ban pynsangeh noh ia kane ka jingiakhun. U Penn um shym la lah ban don ha ka jingialang bad ki lad pathai khutor hadien kane ka jingialehkai namar ba u la mynsaw jur bad donkam ka jingsumar. Shuwa ka UFC 100, u Beau Dure jong ka USA Today u la ong ba u St-Pierre u lah ban long “uba kynsai tam ha ka pyrthei.” Ha katei ka Event, u St-Pierre u la pynliem ia u Thiago Alves, da ka rai kaba ia mynjur lang (50-45, 50-44, bad 50-45).

U St-Pierre u la seisoh ban iada ia ka nam lahdud jong u pyrshah ia u Dan Hardy ha ka 27 tarik u Lber, 2010, ha ka UFC 111, kaba la long ha Newark, New Jersey. U St-Pierre u la synshar ia ka jingiakhun da ka jingtbit jong u ha ka Wrestling. U la jop ia ka jingiakhun lyngba ka unanimous decision (50–43, 50–44, and 50–45). Hadien kane ka jingiakhun, u la pynpaw ba u sngewkmen ban jop hyn̄rei um sngewhun ia ka rukom lehka jong u, da kaba pynpaw ba u kwah ban pyndep ia ka jingiakhun hapoh ki Round. U St-Pierre ula ioh shibun ki jingkynthoh namar kane ka jingiakhun pyrshah ia u Hardy bad um shym la lah ban pyndep ia u.

Ka jingiakhun kaba bud jong u St-Pierre ka long ka

jingiakhun biang sa shi sien (rematch) pyrshah ia u Josh Koscheck ha ka UFC 124, kaba u la jop da ka rai kaba ia mynjur lang (50-45, 50-45, bad 50-45). Sa shi sien u St-Pierre u la synshar biang ia ka jingiakhun, ha kane ka kynti da kaba pyndep ia ka jingiakhun khlem da pyndonkam ia ka buit wrestling hyn̄rei ka jingialehkai boxing kaba kyrpang bad ka rukom kura kaba thikna. Kane ka jingiakhun ka la pynlong ia u Pierre ban khur ia ka pisa kaba \$100,000 ryngkat ka Fight of the Night Award.

U President ka UFC u Dana White u la pynpaw ba u Jake Shields un dei u nongiaikhun pyrshah ban aireng ia u St-Pierre bad ka la pynthikna ba kine arngut kin iakynduh ha ka jingiakhun ba kongsan (main event) jong ka UFC 129 ha ka 30 tarik ãiong 2011, ha Toronto. U White u la ai jingmut ba lada u St-Pierre u lah ban pynliem ia u Shields, ka lah ban pynlong ia u ban kiew sha ka Middleweight Division bad ka jingiakhun kaba khraw pyrshah ia u Anderson Silva, uba dei u lahdud ha ka UFC Middleweight ha katei ka por. U St-Pierre u la pynliem ia u Shields lyngba ka unanimous decision (50–45, 48–47, and 48–47). Haba kylli shaphang ka jingiakhun bad u Silva ha ka jingiakren hadien ka jingiakhun, u St-Pierre u la pynpaw ba um don jingthmu ban bud ia ka.

Ha ka jingialang bad ki nongthoh khutor hadien ka UFC 129, u President ka UFC u Dana White u la pynpaw ba u nongiaikhun ban aireng pyrshah ia u St-Pierre u lah ban long u Nick Diaz u nongjop jong ka Strikeforce Welterweight.

Hyn̄rei ha ka 07 tarik Nohprah, 2011, la pynbna ba u St-Pierre u la ioh mad ia ka jingmynsaw, ka jingmynsaw kaba pynlong ia u ban jah haduh shipew bnai, kaba pynlong ia u ban shah weng noh na ka jingiakhun bad u Diaz. Ha ka UFC 143, ha ka jingiakhun na ka bynta ka UFC Interim Welterweight Championship, u Diaz u la shah rem ha u Condit.

U St-Pierre u la thmu ban wanphai biang bad iakhun pyrshah ia u Carlos Condit na ka bynta ban pyniatylli ia ka UFC Welterweight Championship ha ka 17 tarik u Naiwieng 2012, ha ka UFC 154. Bad sa shisien pat u St-Pierre u la lah ban iada ia ka nam lahdud jong u da kaba jop da ka rai kaba la mynjur lang (49–46, 50–45, bad 50–45). Baroh arngut ki nongiaikhun ki la ioh ia ka khusnam kaba \$70,000 na ka bynta ka jingialehkai kaba itynnat jong ki.

U Georges St-Pierre u la iada ia ka nam lahdud ha ka sien kaba 8 bad u la pynliem ia u Nick Diaz ha ka UFC 158 ha u Lber 16, 2013, lyngba ka unanimous decision (50–45, 50–45, and 50–45).

U St-Pierre u la iakynduh pyrshah ia u Johnny Hendricks ha u Naiwieng 16 tarik, 2013, ha ka jingiakhun ba kyroang (main event) jong ka UFC 167. U St-Pierre u la jop ia ka jingiakhun lyngba ka split decision (47–48, 48–47, and 48–47). Kane ka jingialehkai ka la pynlong ia u ban ioh ia ka khusnam \$50,000 bad ka Fight of the Night award. Ha ka jingialang bad ki lad pathai khutor u St-Pierre u la ong ba un kynriah shuwa kumba katto katne por na ka jingialehkai.

**Ka jingpynlait ia ka nam lahdud bad ka jingsangeh ha ka MMA:**

U St-Pierre u la pynbna paidbah ha ka 13 tarik u Nohprah 2013, ba u la pynlait mon sngewbha ia ka nam lahdud bad u donkam ban shim shuti katto katne por na ka MMA. U la ai ksai na ka bynta ka jinglah ban wanphai biang sha ka MMA ha ki por ban wan.

**Ka jingwanphai, ka jingjop ha ka Middleweight bad ka jingshongthait:**

U St-Pierre ula pynbna ha ka 20 tarik u Jylliew, 2016, ba u dang iakren biang ia ka jingiateg kular jong u bad ka UFC da ka jingkyrmen ban wanphai biang sha ka Octagon na ka bynta ka UFC 206 ha Toronto ha u bnai Nohprah.

Hadien bun bnai jong ka jingiakren, ha ka 15 tarik u Rymphang 2017, la iaithu ba u St-Pierre bad ka UFC ki la mynjur ia ki kyndon pisa jong ka jingiateg. Ha ka sngi kaba bud, u President ka UFC, u Dana White, u la pynthikna ba u St-Pierre, ula soi kontrak biang bad ka UFC. Ha u Lber 2017, u St-Pierre u la pynpaw ba ka jingiateg ka dei na ka bynta saw tylli ki jingiakhun.

U Dana White u la pynthikna ba u St-Pierre un wanphai sha ka octagon ban aireng pyrshah ia u lahdud jong ka UFC Middleweight u Michael Bisping hapdeng u snem 2017. Ha ka 11 tarik Jymmang, 2017, u Dana White u la pynbna ba ia kane ka jingiakhun la pynsangeh. Ka UFC bad u Bisping ki la kwah ban pyndep ia kane ka jingiakhun ha kaba sdang jong u bnai Naitung ha ka UFC 213 hyn̄rei u St-Pierre u la pynbna ha ka Instagram jong u ba u don ka jingmynsaw ha ki khmat bad ka jingeh kaba u mad ban kiew sha ka kyrdan jingkhia kan khanglad ia u ban ialehkai haduh u bnai Naiwieng.

Hadien ka UFC 214 kaba la long ha u Naitung, u Dana White u la pynpaw ba ka jingiakhun (hapdeng u Bisping pyrshah ia u St Pierre) kan sa jia shen.

Ka jingiakhun hapdeng kine arngut ka la jia ha ka Main event jong ka UFC 217 ha ka 04 tarik Naiwieng, 2017, la jan saw snem naduh ka UFC 167, ha ka por ba u GSP u la iakhun khatduh. U St-Pierre u la pynliem noh ia u Bisping lyngba ka Technical submission ha ka Round kaba lai ban kylla long u lahdud ha ka Middleweight Division bad u nongiaikhun uba saw ha ka histori jong ka UFC ban long lahdud ha ki ar tylli ki Division. Kane ka jingjop ka la pynlong ia u St-Pierre ban khur ia ka khusnam ‘Performance of the Night bonus award’ kaba nyngkong. Ka jingwanphai jong u St-Pierre sha ka octagon ka la thaw ia ka rekord jong ka iew die ia ki tiket (pay-per-view) market, kaba la tam ia ka jingiakhun jong u Floyd Mayweather vs. Conor McGregor ha u bnai Nailar 2017.

Ha ka 07 tarik Nohprah 2017, u St-Pierre u la pynbna ba u la pynlait noh ia ka nam lahdud jong ka UFC Middleweight hadien 34 sngi ba u la bat ia ka belt. Namar ka jingshitom, u St-Pierre u kwah ban kiar na kaba bat ia ka nam lahdud jong ka UFC Middleweight. Ha ka 21 tarik Rymphang, 2019, u St-Pierre u la pynbna paidbah ia ka jingshongthait jong u ha ka jingialang bad ki lad pathai khutor ha Bell Centre ha Montreal.

Ha ka 09 tarik Jymmang, 2020, ka UFC ka la pynbna ba pynrung ia u St-Pierre ha ka thup kyrpang jong ka ‘Modern-Era Wing of the UFC Hall of Fame’.

Ha ka 09 tarik Jylliew, 2021, ka Saint-Isidore ka la pynkup burom ia u St-Pierre da kaba plie paidbah ia u motdur uba kat ka rynieng briew uba 136 kg, ryngkat bad ka jingthoh shaphang ka jingim jong u kaba la ai kyrteng “Place GSP”. La shna bad pynieng ia une u Mot hapoh ka octagon kaba pyni ia ka rynsan iakhun jong ka UFC. Ha u Risaw 19 tarik, 2023, u St-Pierre u la iohpdang ia ka Order of Sport bad shah pynrung ha ka Canada's Sports Hall of Fame.